

莘野遺書



關中叢書

康莘野遺書

邵力子署

刪訂莘野先生遺書小敘

莘野先生余之族高祖也既沒之三年其弟仲文公取薛文清楊忠愍自敘年譜例爲先生敘其生平實跡并錄大人君子題贈文辭詠歌以爲先生光先生可謂有難弟矣然藏于笥篋者已多歷年所嘉慶丁丑戊寅閒先生元孫兆熊出其書見示于端捧而讀之如見先生鬚眉言笑于行墨閒仲文公之述此亦猶端之集莘野外集也事有同心可以作矣然其中不無支辭漫語求實而反失者是以妄加刪削至于事之有見於他說而此書不存者亦增入之噫過矣先生以海內達人無論僮父野子無不知先生

者先生之學問人品寧待述而後明哉雖然河津椒山之
所不廢亦即先生之所不棄也後生小子何憚而不爲哉
戊寅二月中澣族元孫端立山謹識

莘野先生遺書卷首

同懷弟康緯述記

族元孫康端刪訂

年譜 附碑銘誄詩札跋

崇禎癸未先母王孺人夢日落入懷中而兄生焉

順治庚寅入塾寡言笑不好嬉戲口微吃誦讀多不能記

熟既而叩之未嘗遺忘也 時年八歲

壬辰師授周易兄於正課之暇私購詩傳一部早夜挑燈

別室研朱評點讀之不厭 時年十歲

丙申季冬武侯心書箋註成 時年十四歲

丁酉師以直省程墨課兄私意厭薄之自購金正希黃
陶庵陳大士包宜壑諸大家文讀之又訪徐天池袁中郎
諸集嗜如飢渴

辛丑外侮大起兄堅忍不顧嘗自題聯語于臥室中以爲
刻勵之辭

康熙壬寅童試冠軍四書黃河錄成

癸卯先母王孺人卒哀毀骨立先君約齋時以禮節之

丁未陝西學使大呂呂公和鐘校士奉先拔童子第一稱
其文爲七邑冠

戊申咸寧丞雲中郭匡廬先生傳芳署邑篆於兄有國士

之目爲先清懿公作傳後令頻陽每稱兄之文行蓋屋李
二曲富平李子德華陰王山史郿縣李雪木諸君子皆景
仰深慕有不識伯淳之歎

庚戌偕緯讀書羅山寺

辛亥四弟河清生繼母

病卒時緯又有妻喪兄憂之

有眼疾踰年始愈

壬子應道憲容城胡公諱戴仁之聘館于關門胡公多藏
先儒理學諸書如劉靜修陳白沙楊忠愍及蘇門徵君夏
峯先生之文兄且讀且錄今手蹟猶在笥焉

時年三十

癸丑遣使拜械走蘇門求徵君爲先清懿作諡說徵君年

已九十矣聞使卽手書以報之

時年三十一

甲寅蘇門徵君手書兵農禮樂堂五字寄贈

丙辰正月子无疾生秋如整屋謁二曲先生先生累辭徵
辟日夜居母祠中反關謝客聞兄至獨破例見之歡若平
昔兄歸先君喜曰吾仰止先生有年矣不獲一親道範今
汝得所依歸勉之哉自是兄與先生情同骨肉往復論學
非尋常所能解後先生求兄作賢母祠堂記讀之嗚咽流
涕以爲如蘇文忠公表忠觀碑

丁巳有江南之行與牧齋門人姚子揆采亮居建平署中
刻三千里詩一卷夏遇牧齋先生于鍾山會齋亭不合還

次白下刻朱子白鹿洞學規邑逸民李向若先生灌遺詩
各一卷

戊午書目日程垂三年始成就正顧亭林先生於華下竹
林寺中晤子德先生於頻陽作莘野集序又遇傅青主顧
亭林二先生於徵君王山史家中亭林與兄譚甚合以所
著昌平山水記示兄兄不移時閱畢先生深異之贈以詩
句聯語並所刻日知錄生員論錢糧論北遊詩下學指南
令先大父夢庵集諸書同遊華下見昔賢題詠命緯悉錄
之遂著華遊雜記一卷既又三先生議祀朱子於嶽麓而
建祠于雲臺觀之右兄讀書于玉女峯是歲冬學使葉公

映榴錄科拔第一食餼

辛酉讀書落雁峯華陰張子餘太史曾慶時爲諸生有搆
訟不測之禍就謀于兄兄令避鋒于京師哭而送之事果
平亭林先生作莘野集序成

壬戌

癸亥子德先生匾兄之讀書廬曰出處名賢

甲子夏山史先生手書吾道星嶽四大字並述古聯以贈
金陵鄭谷口簠八分書是歲先君見背二曲徵君大書題
墓石子德先生爲表山史先生爲誌銘二曲先生遣門人
甯維垣徒步六百里代祭越數年維垣死妻子幼弱有怨

家兄言之當道表其閭怨家不敢發 仲冬一日大雪終
天遺哀記成二曲先生序之

乙丑葬先父母於黃河岸上刻諸名儒之文于石遠近會
葬者甚衆

戊辰修葉華雲先生祠請祀三仁君于城北樓上秋朱竹
垞先生以聯句寄贈 冬學使張公光豸歲試拔第一

己巳與二曲先生同著相譜成 率紳士修葺卜子夏祠
庚午臨洮李馨丞竟陵以豪放失職來客于郃謁兄未幾
馨復他出妻女無所歸兄迎館于別業關中時方大饑斗
米二千錢兄拮据饋餉無難色不數年有傳馨死者其妻

聞之痛絕再四遠近踵門議婚者無數兄以正色拒之與
緯議曰嫁友人之女古雖有之而此非伊之故鄉吾寧遣
之遂使邑人馮三樂如臨洮招內兄陳生爲歸計資斧不
給兄貸金數十兩令歸焉馨亦未死越二年客京師而亡
兄聞之悽然曰蘭若之骨終不西歸矣厥後有自臨洮來
者言馨女已配邑人庠生某且抱子焉學統辨四卷成凡
五易其稿攜子无疾讀書于研山寺中學使錄科復拔第
一

辛未春太乙子書三卷成秋居易堂家祭私儀成山史先
生攷正焉冬如盤屋二曲先生大書道德經濟文章氣節

八字見贈

壬申大旱 火相譜於橫渠祠蒙上旋曰學達天性康乃
心與三李講學其閒道義文章一時亦足千古 冬李明
府聘修邑志作八高士傳高節婦傳二篇旋罷去 大司
寇徐健菴先生顏兄之讀書廬曰大方家

癸酉崑山相國門人鈕玉樵琇令白水聞人誦兄長安盧
節婦詩曰春風蛟蝶追響崆峒矣遂枉駕敝廬兄故多髯
公著觚贖集云余生平所交海內三髯一爲慈谿姜西溟
宸英一爲邵陽康太乙乃心一爲陽羨陳其年維崧初與
子德太史書曰邵陽康子體偉而多髯作字如蝌蚪其詩

豪蕩感激大類青蓮倘賜以瑤函爲介惠然肯來不亦將
嗣賦高軒哉子德先生病兄命緯往候之未幾訃至大哭
過慟與同學私諡曰文孝先生作斷句三十首以哀之

冬十二月河山兵法成

甲戌同雪木先生讀書於華原五臺山作五臺山記學使
武公之亨歲試拔第一

乙亥請命修聖廟建儒學公署邑令郭公峻首領 臥龍
六論成

丙子二曲先生壽七十兄命緯往祝焉 二月朔火兵法
六論于澹圃之臥龍庵 客歲如青門題秦莊襄墓詩二

絕拜馮恭定公從吾整別朱王孫二玉詩並書于慈恩寺
塔春三月王阮亭戶部奉使祭告西嶽江瀆遊慈恩寺見
石刻嘆爲絕唱詢其里居姓字宜興龔勝玉詳以對之刻
詩于秦蜀驛程後記中事又載於漁洋詩話上達御覽邯
鄲鼓瑟之句無不傳誦矣 客耀州署西有菜圃爲宋尙
書邵陽太簡雷公之侍親讀書處兄言出處于州牧李公
銓重爲修葺繪圖刻石賦雷園懷古詩作記以傳之 夏
學使武公錄科拔第一 冬枕中雜記三卷成

丁丑募修梁山大禹廟五年始成王山史先生書榜河東
徵士吳天章集句寄贈 居易堂續喪禮鈔成王山史評

定焉 與縣丞董公訪正元聖墓于縣東南秦莊頭修葺
之學使陸公命樹柏數十株立元聖故里碑于莘村孔道
重修東街元聖祠集董其昌書以額之 爲學錄二卷成

學使陸公儼庭

德元

拔之充貢賦

戊寅如都雝試拔海內第一大司成特公某樹峯孫公岳
頌少司成寄亭張公豫章以及諸大僚皆留守國學兄固
辭旋里 謁阮亭先生于京邸阮亭先生語座上諸公曰
吾與康子相知緣最奇遂誦題莊襄王詩以爲用事妙絕
可駕唐賢之作次詢家世又特揖之曰累世通家蓋以先
清懿公令臨邑時與先生伯祖太師象乾公有舊故也

秀水徐道冲祚增本華隱先生嘉炎嗣也以故人之誼謁
兄遂敘莘野詩集題聯見贈又晤中牟冉永光先生覲祖
于客中 客中雜記成金臺旅史附未定

己卯春訂頑錄成郵寄阮亭先生評定 緯子无咎入庠

秋兄受知於陝西主司廣陵陳公元龍檢討海公寶座
師文縣令江公某薦領第五名經元榜發兄謁陳公見而
喜曰吾司衡得子一榜生色矣聞子文章節操殆非一世
之士

庚申春試禮闈下第先有爲兄勸駕者兄叱謝曰孝肅笑
比河清太尉夜畏四知吾素志也老驥寧甘自鬻哉言者

斂首而去 晤襄城李禮山先生於新城座上遂訂交焉
上諭詞臣薦舉才學博雅之士以備南書房顧問廣陵陳
公元龍張太史廷樞副憲勸覲公杜訥同具章疏將以兄
薦張太史曾慶止之曰太乙多病兼之不諳朝儀恐不克
靖厥職矣事乃已兄聞之喜曰子餘愛我者也 請命於
邑令郭公修四后祠文以記之 內大人某至關門呼吏
謂歸欲晤康太乙先生言已卽又馳去關吏奉命至門兄
以病辭 臨潼趙明府于京聘修邑志又作華清一卷刻
成竟與原稿一字不同人所不解

辛巳六月河山詩話草稿成九月恥齋別箋成

壬午韓城康明府行簡聘修邑志八卷成 王貞文先生

遺事述成

貞文王山
史私謚也

癸未宗人有妻死者貧不能葬兄給之以金遺一女無居

處兄撫而嫁之 夏好我篇五卷成偕子姪登華嶽時聖

駕西巡廢紳劉蔭樞等復職駐蹕潼關十一月二十五日

蔭樞迎駕謝恩特旨召蔭樞御前從容問其科名爵里並

山西學使汪灝清廉狀次及二曲李顥富平李因篤有子

無今作何狀蔭樞以知不及詳不敢妄對奏上又問關中

理學經濟之才蔭樞奏有邵陽康乃心上曰朕知其名今

居何職蔭樞奏曰己卯舉人上曰何以不中進士想是詩

好而時文不佳乎蔭樞奏曰此等人原不以時文論也臣
近見其文出入經史雖古大家不能過上首肯命侍臣記
之上還京欲特旨召用朝中有忌劉蔭樞者遂不果陝西
布政司鄂公洛扁其門曰關西夫子

甲申毛詩箋成

乙酉冬入都

丙戌下第平陶令王佩可綬聞兄道過介兄年友劉豫山
涵敦留作邑志 改巡撫生祠爲子夏祠以所藏王山史
手書西河書院四字額之 刻先儒格言亭林先生關中

雜詩 對聯無益錄成 重訂學統辨成

丁亥六月爲水清上人營室梁山山下 二十一日晨起爲
人書扇二秉巳時故病忽作二十二日戌時卒壽六十四
歲

Blank manuscript page with vertical columns.

六日... 二十一日... 日... 日...

康太乙先生墓表碑

康先生諱乃心字孟謀號太乙由邵陽縣學生拔入國子
監康熙己卯陝西鄉試舉第五試禮部不第歲在丁亥六
月先生年六十有五卒於家明年葬於縣東小伏六村余
時居京師聞其訃悲傷之不已蓋余耳熟先生名讀其書
慕其爲人慨夫賢者不多得關中之文獻歸然獨有先生
而竟云沒也又三年其子无疾以書來請曰先生知先人
久矣先人生平文章傳布人閒行己特立有千載之志未
嘗以窮少挫所交皆當世巨公長者以不及見先生爲憾
舉先生文以教訓子弟今先人已在壤惟大書以表之俾

德潛而光惟世世不敢忘謹按先生年譜及襄城李禮山
來章所撰傳先生曾祖諱先民萬歷戊子舉人知山東臨
邑縣追祀名宦鄉賢祖諱國祚以庠監生授鴻臚寺序班
父諱姬冕縣學生先生自少勤誦讀舉筆不屑諧俗試輒
冠其儕長尤篤志聖賢經濟之學是時顧亭林先生抱儒
學往來關中讀書講道日與李王諸君子及先生遊司土
之吏及輜軒所過無不望風式廬先生時侃侃陳利弊累
有功於人也表元聖墓復子夏祠祀朱子於雲臺觀右其
又有功於神如此生平所爲文章無不慷慨遠懷讀之興
起而題秦莊襄王墓詩尤爲新城尙書王漁洋先生所驚

歎今已錄刻于秦蜀驛程記漁洋詩話諸書己卯鄉試經
義論策古雅拔萃海內靡不傳誦也居親喪盡哀待師友
患難死生無閒家貧自守甚峻天子幸陝西詢其鄉之賢
前給事中劉蔭樞以先生名奏左右侍從之臣又多欲薦
先生先生處之冲然有貴人踵門納交先生謝以病不苟
求合也修韓城平遙二縣志著毛詩箋家祭私儀等書娶
路氏子男一卽无疾縣學生能讀書紹先業者也嗚呼先
生篤實耿介之性可以廉頑立懦蒼深典博之才可以復
古振今一舉于鄉而終不遇名聞于上而不及用豈蒼生
不當蒙儒者之效與抑惟闇然修行于家其流風所漸尤

遠耶而今已矣先生同里前編修慕莘先生與余同姓其
頌慕先生不絕口巡撫陝西都御史鄂公子達履中禮善
爲余言關中康先生今之師表沒之日泫然誅之先生爲
諸宿老所敬重而同時服之如此聖朝獎善勸學必有旌
其身後之典一二執筆領史局之臣方錄其鴻篇實行而
余與先生相知于性情文字之中序次本末勒諸墓石庶
幾表先生之幽以慰其孤之請過者覽之其能無悲也哉
康熙五十一年六月賜同進士出身翰林院檢討纂修政
治典訓嘉定張大受撰

莘野先生神道碑銘

關中康先生諱乃心字孟謀一字太乙左輔郟陽人郟陽古有莘國也無遠近學者皆稱莘野先生先生年未七旬而沒沒之明年爲康熙四十七年戊子孤子无疾于閏三月廿日歸葬先生于縣東三十里小伏六村先生世居縣城內經道於此于是黃海老友吳起元大書刻石爲之銘曰卓絕天縱蓋世人傑師廣川法景略理學經濟一代偉哲終不遂一志河濱漁老黃海臣爲之表使後之君子過而識之曰此大布衣莘野先生墓道戊子端陽節題

附錄厓湖太史張曾慶復无疾求志墓札

尊府君志墓之文自當代大儒巨筆如達履中先生其人

乃履中不敢任厥責謂非細故而余何人斯且將老死不
堪世兄顧以之謀及耶然情弗獲已各盡其在己者越旬
日始草成支辭蔓語實不能闡幽德於萬一亦實不能文
聊稱擬作萬不可用還當求諸履中聞履中爲尊府君作
小傳并誄文不輕示人未審達之世兄否尊府君世家傳
孝山先生曾郵寄示筆墨遒勁與古爲徒矣但敘先世處
引征役大紀一段甚是含糊余偶於白匡案頭見其全書
因查康氏傳諱民者字德淳康叔裔也先世河東人祖祉
始遷邵陽爲元博士父德淵以民貴封宣義郎民從明太
祖以軍功定天下冊勳授宣義郎東城兵馬司副指揮傳

中亦無他述俱軍功耳書凡八十卷五十冊成于永樂三年

附誄詞

我友一康在洽之陽系衍康叔世閥迭昌魁首名流關西
休揚孝友天植至性肅將早擷芹華歷冠膠庠耕莘志尹
一畝徜徉陋巷學顏四代儲藏先民典型大道隄防蒼松
古柏勁節凌霜湘蘭淇竹佳氣騰芳我覲之子展也非常
久交彌敬道義文章特白厥情五夜淒涼

哭康孟謀孝廉三首

萬木凋零後遙天一雁來秋風哭素友落日愁金臺回首

洪河側傷心蕙草摧翻疑天老意不爲世憐才

自有凌雲氣無難萬仞翔皇天獨何意白日不迴光松柏
餘冬性河山寄草堂居然成野鶴蕭索洽之陽

往歲一爲別多情書屢聞憐予不得意慰藉何殷勤笥貯
蘭猶臭山空玉已焚相思頻灑淚誰與共論文

贈康孟謀孝廉三首

青青梁山柏託根白雲徑根幹一何修枝葉一何盛四時
有清風霜寒節逾勁本非桃李質肯與芳華競巖阿繫我
思天然抱真性

洪水逝茫茫神瀆湧清光蘋藻宛在中皎潔涵餘香豈惟

羞嘉賓可以薦明堂過時而不采行道爲悲傷惟彼葵與
藿翩翩紛向陽

鴻羽需爲儀而乃在林泉俯飲清渭流仰食華嶽蓮一舉
數千里橫絕四海閒秋風鳴蕭蕭落日下平原豈不惜遲
暮時哉復何言

大司寇徐健菴先生見贈

聲譽齊三輔文章逼兩京星辰占處士歲月老諸生道在
貧何病才高望不輕南陽方抱膝未許事躬耕

河東賈可齋先生贈別

讀書曾住最高峯聽遍山僧石室鐘文吐九苞胸有鳳濤

傾萬斛筆如松賦京早識張平子入雒羣知陸士龍憶共
西堂剪燈話那堪衰柳折臨潼

三原咎茹芝贈

龍門客接仰威儀玉屑紛披入座時樂道擬題莘野廟悲
風讀拜茂陵詩文章原合天人厚氣節翻從世運卑家本
關西懷故土今朝旣見倍相思

莘野先生遺書卷首終

跋

夫子名重一時邑宰上官莫不俯首請教言無不行求無不獲而夫子以道自重義不少有干謁嘗榜廳事曰不聽閒話不看詞狀不譚人閨閣不管閒事不以私謁官長夫以夫子之高誼揆諸古人何多讓焉至若兄弟同居五十餘年未嘗少有閒言視諸姪過於己出終歲布衣蔬食日用之需每至乏絕則向夫人脫簪珥以佐之生平以私妻子財利爲戒捐館之日至無以斂卽三尺童子莫不感歎流涕嗚乎此夫子大節所在足以砥礪末俗維持風教不以生存不以死沒者也

頻陽門下何大治謹書

莘野先生遺書卷上

莘野康乃心著

頻陽李因篤訂

松陵鈕琇訂

詩

渭北寄弟仲文

時讀書乳
羅山中

又是清明近征塵沙苑西
津亭官柳暗澗樹亂鶯啼
目極風烟暮魂驚節序迷
羅山長憶汝佛火伴幽棲

其二

無才追子建有拙似袁安
卜命身如寄裁詩夢欲殘
愁懷

憐放浪病骨任躑躅 一片王孫路春陰 二月寒
李二云結忽一宕全篇

色生

渡灞

曉渡林烟靜 山河此最雄 荒陵傳漢德 一水壯秦風 玉帛
千官會 車書萬里同 帝城餘斷壘 折柳問橋東

九日禹門

爲愛登高節 呼朋探勝遊 村村紅樹暗 澗澗菊花稠 鷄犬
疑王世 桑麻念帝猷 荒山風雨急 燈火宿林邱

其二

大野蒼山斷 洪波兩岸開 神工眞斧鑿 河氣似奔雷 世自

陶唐賴功從至孝來居人傳禹墓浩淼望中猜

九雲閣晚眺

薄暮憑高望寒蕪落照回平原千古盡野火一年催壘廢
淮陰渡烟荒武帝臺譙樓聽鼓發徙倚問江梅

文杏

淺碧深紅際欲開半未芳橫窗偏有態傍檻更聞香絕豔
華清醉含愁洛水妝輞川三月館留汝伴仙郎

頻陽謁忠介斛山楊先生祠

聊作頻陽客夙知伯子名逢人詢故里下馬得連城碑老
禾中斷臺高雨後清十年勤寤寐今日拜先生

其二

嶽嶽丹青色居然斗氣寒秉璋疑拜草危坐似箴官直道
違時易孤忠見信難但留風節在終古夕陽看

其三

憶得躬耕後旋當受命初清操師百世衰節抱窮廬六載
蒼生淚一封補闕書澹園荒雪夜燈影幾躊躇

其四

信是稷伊流寧同管晏儔數奇非術淺臣罪亦君憂刳斷
榛苓夢風餘鼓角愁九原今已矣烟雨萬山秋

紅葉

風急雁驚寒林塘一望殘經霜深淺醉著雨去留難恨別
江郎賦悲秋宋玉歎那堪搖落盡片片淚河干

上元

時有秦州之俘

上元逢雨雪梅柳度窗徐人事新年少烟花舊夢踈一燈
猶記節幾郡已無廬此夕關山外琵琶掩淚初

午日

千年荆楚節一日大河墟漫引昌陽酒閑披抱朴書病聞
風掃榻貧見鳥窺廬艾虎長生縷窗前戲笑初

虎頭生五日兩姊以

五絲飾之爲戲

苦雨

旱虐經時見秋霖苦又多民窮今已極天意更如何永夜
聽簷霽平明看漲波室廬愁萬姓搔首動悲歌

其二

烟火家家絕經旬總未休衝泥人似蟹習坎屋疑舟陰盛
推洪範流亡憶楚丘茫茫終宇宙不敢太平謀

西峯

歷覽層霄外扶疎檜影斜有身渾染翠無袖不沾霞峭削
窺千仞浮烟渺萬家峯峯皆秀絕第一是蓮華

玉女峯阻雪有懷顧亭林王山史二徵君

倏忽風雲起繽紛洞壑餘開軒重嶺隔掩戶石林居萬古

匡山業千秋白岳書傳經今日事搔首一躊躇

其二

十載蓮華計淹留亦大宜燒松香入夢煮石缶生芝身世
連朝斷空濛四顧奇幾人曾到此雲霧掌中披

贈友

相逢王逸少五日挹清輝聽雨看寒劍燒燈坐翠微君從
沙塞去我向大河歸聚首何年載愁隨旅鴈飛

仙宮村雷鄰翁

武帝遺宮舊宣徽姓氏深結鄰同白社採藥不黃金幾次
躬耕計半生梁甫吟山前秋正好烟雨欲相尋

潼關阻雨

幾日泥中客，關城汗漫栖。
烟花三月近，風雨二陵西。
野闊征鴻滿，沙平岸柳迷。
勞勞塵土際，枕劍聽鳴雞。

六月一日訪二曲李徵君，懇留信宿，賦此志懷。用太

白李雪木述懷初韻

盛代全嘉遯，南山接豹林。
避人城郭外，築舍薜蘿陰。
雞黍三秋夢，乾坤萬古心。
燒燈風雨夜，端不負追尋。

朝元洞

驟雨朝元洞，荒林日暮時。
客來留半榻，門掩讀新詩。
廚濕山柴竈，風翻老樹枝。
丹丘餘太古，更訪賀仙碑。

寄山陽令胡右文

見說山陽縣連年政化成千村無吏跡一路有歌聲
曉日齋廊靜高秋黍稷平桃源應在此處處野人耕

其二

茂宰林尖後燕南自世家論文尊海嶽謂太先生信山好古祕龍

蛇藏陳白沙墨跡老我班青鬢期君煥白麻漢廷方有詔驄馬望

京華

旅舍

萬里平原暮三春客夢長寒燈銷寂寞夜雨動悲涼且漫
尋書帙無從問藥方徘徊愁欲絕不爲鬢成霜

長安途次有懷故山兼念子弟讀書其中悵然賦寄
紫山維摩地高潤出層雲佛日清輝滿僧房黛色分我行
猶獻賦汝輩好爲文馬首風塵裏遙憐石磬聞

中秋夜闈中坐月懷朱王孫二玉

此夕秋闈月中宵獨自看碧雲開萬井玉露濕層欄漸覺
通銀漢遙知近廣寒燭殘還擬賦彩筆報潘安

上元前夕燈花結爲奇蕊喜賦

上日燈花好今看更不同深添蓮葉蓋細結蕊珠叢一朵
垂垂碧終宵炯炯紅新年餘瑞色何事喜相逢

槐花

今歲槐花盛秋來樹樹黃隨風鋪石徑帶雨漬銀床忽映
中書閣遙分帝子裳却思金馬客終日爲君忙

重九前二日贊府孫公招諸同人羅山寺登高漫賦

爲報重陽近招尋勝地來秋從平野淡寺傍大河開藉草
依陶社臨風悵謝才寺壁有羅南詩龍山今日事莫負菊花杯

元日望華山雲臺觀有懷先君舊館

先子譚經處幽棲近草萊烟光渾似舊嶽色杳難開李云淡語

最傷信推老手白髮窮生計青緇恨不才招魂如可賦寂寞傍雲

臺

新豐

千年車馬地一劍悵重遊玉輦唐宮恨銅人漢苑愁烟從
平野漫秋爲遠山留勝事猶堪問王孫舊酒樓

灞橋

七月灞陵道蕭蕭兩岸秋經年烟柳色幾處綰離愁驛接
長楊苑山連五鳳樓題橋思往事千載帝王州

省亡妹墓

孤墳曾幾日別淚已三年兒女還疑夢衣裳尙復憐寒原
愁遠樹夕影沒荒天痛哭黃河上重來倍黯然

斜口阻雨

幾日勞勞客塵沙度渭城狂風吹繡嶺急雨入華清旅館

燈花靜中原穀價平

郭景卿云
臺閣氣象

五陵餘瑞色
盃酒灞橋行

客齋

午日明朝節
呆窻曉露開
燕鳴辭壘去
客倦抱琴迴
妻子皆貧病
田疇半草萊
故園山閣下
應是雨肥梅

輓郭景卿

郭象今何處
青門澗樹荒
故人三尺土
新恨一頭霜
雨雪

離亭晚

辛未秋深君與
余飲三原客舍

關河別淚長
那堪尋宿草
孤劍掛

殘陽

陰雨累月

連年愁旱虐
五月反秋霖
麥豆萌芽老
田疇蔓草侵
數奇

驚世運悔禍望天心更有飄淪處千家哭漢陰

時興安覆于水最慘

四月四日先君墳作

祖母今辰忌墳田却漫行蘋蘩兒婦薦湯餅幼孫盛歛憶
終天別長憐望圯情黃河楸柏下華髮哭殘生

送仲良館少梁

送爾韓原去清秋塞雁來長貧時感嘆岐路更徘徊主有
陳蕃榻門多鄴下才高齋山水勝絳帳好相開

少郎雷甥病後夜語

一病休文沈三冬擁絮眠有兒思靖節無室學梅仙吾道
今誰是人生盡偶然中宵名理勝流水任年年

垂老

漸覺垂垂老難堪漠漠愁西風驚短鬢曉雨報新秋花落
庭槐滿雲歸石徑幽百年衣絮恨慘澹到心頭

寒食村居

寒食荒村裏綠楊已帶烟柴門來燕子深巷話桑田禁火
存三晉淒風入舊年空庭人跡絕抱膝對芊綿

其二

戰鼓春風急長征壯士違雁鴻愁擾擾楊柳正依依經術
河汾拙客星釣瀨微飛熊今古夢冥沒任漁磯

其三

佳節清明候却逢上巳晨杏花香野店社鼓賽羣神征戍
中原淚煙霞一徑春溪行藜杖闊且欲傍鄉隣

其四

積病餘生瘁長貧萬事難有家同泛梗入世總波瀾華髮
春前短陰符醉後看棠梨深院雪月色共清寒

華原太守贈蘭一本書屋皆香因賦

嗟爾幽蘭質孤貞抱異光深山曾託種衆草豈爲芳九畹
騷人佩千秋王者香同心應似此斗室伴藜牀

雷園懷古

一片烟光裏何年有道居名園開列岫選勝傍清渠燕語

猶尋壘客來自讀書濠梁真未遠晨夕轉瀟疎

其二

太簡棲遲日還同鯉對期世家餘舊烈高詠得新詩却憶
分符後應憐獨嘯時只今蕪草下若爲訪殘碑

其三

大雅宗臣範名儒起夏陽眉山驚曠代刺史重巖廊北斗
文昌座西園太室藏風流知未墜猶記尙書郎

其四

郡齋十畝間風日亦閑閑柳黯鶯聲老谿長藥草斑官清
蔬作課客倦戶重關豈必冠爲鐵騎牛夢故山

其五

樹老煙長補山寒日易斜
紅香殘夢蝶青草亂鳴蛙
三世忠移孝何年宦是家
不知從景祐聚散幾官衙

其六

亭池盡草萊一望夕陽開
世自何時古我從故里來
長留烟雨色不爲廢興衰
應有遼東鶴蒼茫華表回

其七

石室傳經久行藏莫浪論
漫游周柱下還似漢龍門
師古追循吏搜奇每晤言
舊槐新綠展吾道在乾坤

澄城

黯風吹急雨霜降是明朝客路寒砧外孤城塞鴈遙菊憐
元亮宅烟鎖渭陽橋訪舅氏不遇多少窮途淚旗亭肯見招

蒼頭嶺以上路

一度蒼龍嶺長如天半行青松披石徑斷壑俯秋聲藥氣
風雲捲烟州洛渭平真源通咫尺搔首望西清

諸馮村舜帝廟蒲州

帝舜村還在諸馮亦舊墟王風開禹稷盛際想唐虞俗自
河濱古史傳負夏居遙知揚側陋此地起耕漁

其二

出沒浮雲際憑高得帝鄉山河疑大麓藻火見垂裳世覺

鴻濛近人分日月光階前韶樂在鳥韵似笙簧

其三

稽古中天聖邈茲末世民忽焉成曠代回首欲沾巾野廟
丹青遠荒邱草樹春低徊瞻拜久玄德浩無垠

其四

大孝格皇天烝嘗舊里傳古文眞近是聲教信殊焉別室
烟光迴明禋一氣連西京周世子錫類在千年

其五

似見媯濱化穆然帝子顏南風來雅奏烟雨上雙鬢伏臘
明妝在松杉珮影閒却憐梧野去竹淚尙班班

其六

迤邐古陶城有虞自昔名應如雷澤釣不獨歷山耕制器
皇民利因天太樸成執中皆聖學斤谷恍聞聲

十月六日自咸林歸次郡中金塔寺忽憶仲弟生辰
枕上漫成一詩遙寄爲壽

仲氏今晨降蹉跎五十年世情憑冷暖吾道付人天耕稼
留三古索邱抱一編僧寮思壽汝百福在心田

九日將如少華白德生雨中見過弟仲文從子无咎
同醉僧寮率爾爲賦

風雨登高節客來慰別離故人驚短鬢碧殿冷霜枝痛飲

黃花酒狂吟白社詩他鄉兄弟好勝會復何爲

太行山中

三千
里詩

亂山窮斷續飛石起嶙峋商賈汾兼潞民生鐵與薪樓臺
摩詰畫雞犬武陵春須記澤州谷不愁終歲貧

黎川阻雨

三千
里詩

僕馬千山裏崎嶇五日經杏花黎水岸雨雪太行亭沽酒
酬寒劍拈詩望曉星遙知絕頂上隨鴈入青冥

中牟道中

三千
里詩

大河風日苦兵火幾家存衰柳平沙岸窮簷蔀屋村民情
憐鄭俗司牧媿監門誰施光明燭封章達至尊

得邢侍御子原先生臨邑志內有先清懿公循良列
傳愴然感賦

蒼茫何處問初丘石室一編喜病眸伏枕先尋新傳記按
圖載想舊松楸漢家獄吏門如故太傅荆南淚未收文獻
只今千古事岱宗極目意悠悠

其二

華岳峻嶒渤海東關西伯起見清風碑傳有道文章遠地
接萊蕪釜甑同三世箕裘留太史百年俎豆怨哀鴻九京
倘有淒迷路哭向荒榛暮雨中

讀兩賢集

平生磊砢古人期此日龍光動尾箕幾夜涕零忠愍傳一
牀風雨靜修詩昭陵去後勳名薄梁甫長吟氣象奇烟月
迷離如有約願將清夢訂相思

東李向若先生

黃河東去斷天涯舊是秦人避世家一曲紫芝歌太古五
株青柳記年華鴻飛鳳冥乾坤外流水高山歲月賒莫道
橋頭迷臥虎於今文獻續烟霞

李云高士佳吟足以相匹

潼關秋興四首

秋老巖關落葉初荒城幾堞戰爭餘河山百折開秦晉門
戶一丸控楚徐萬里風烟通弔伐千年興廢總邱墟黃昏

極目憑高望莽樹寒榛夕照疎

重樓獨上勢茫然坐對蕭條薄暮天
譙樓聲殘征戍淚銅駝夢老聖
明年秋深白帝孤城月雁唳荆門
萬壑烟唱徹關山遊子曲悠悠京
洛路堪憐

虎踞龍蟠天塹開雄山四塞拱烽臺
陝分驛路三川去河抱重關萬里來
蜀道淋鈴催暮雨秦宮劫火冷飛灰
須知設險難憑恃今古登臨共一哀

蕭蕭白雁菊花黃一夜嶠函欲變霜
斷井寒烟埋曉日關城風物近重陽
貔貅十萬王師度輸運經年棧道長
最是閨愁銷不得砧聲急處動悲涼

蘇武墓

蘇卿眞在此山隈古木荒邱老碧苔風雨千年雲獲穴南
枝三百影含哀烟銷閣上麒麟去霜破長空鴻雁來有客
登臨尋短碣黃昏歌下少梁臺

翼城

三千
里詩

汾水逶迤驛路通叔虞曾此肇封桐河山獨擅中原勝冠
帶曾馳泗上雄事去遺踪留斷簡客來杯酒問唐風翼城
關外蕭蕭雨一夜青苔滿故宮

度太行望蘇門有懷孫七公孚

三千
里詩

烟雨空濛散曉鬢羣峯疊出太行山星開上黨分參野勢

折中原障漢關車度羊腸懸嶺轉人穿鳥道倩蘿攀行行
極目百泉路一路憑誰寄往還

陳留弔蔡中郎

三千
里詩

陳留老樹接殘墩何處當年郎將村若使典章成虎殿應
知渾噩並龍門八分剝斷星雲盡幾帙飄零海岳存誰向
軼才憐曠代千金獨有魏公恩

淮上感見二首

三千
里詩

清明三月野陰寒幾處樂昌哭鏡鸞馬墮殘粧和恨結身
奔驛路隱愁看離魂忍逐征鴻去別淚難尋鬪草歡望望
徐郎從此訣死生敢向大刀觀

固姑新挽舊烏雲枕上湖山夢裏分烟柳不知邊塞雪石
榴無復漢宮裙李云佳句他鄉姊妹紅顏命入夜琵琶野老聞
最是天心渾似鐵年來辛苦嫁明君

郎川署中留別姚四揆采

三千里詩

垂釣年年渭水湄郎川今日漫棲遲客中相識渾如舊醉
裏狂歌更不疑滿目江山憑弔古一窗烟雨細譚詩秣陵
此去西歸棹春燕秋鴻不忍思

和秦州女郎詩

三千里詩

女郎秦州人遺其姓氏乙卯之變爲王師所俘東
至河南府賦詩自悼後以贖歸卽痛哭自絕蓋年

方二九云中州士大夫守令憐而和之闕然成帙
名曰秦州烈女詩嗚呼傷哉女烈矣丁巳五月余
歸自秣陵次宜陽友人有述之者余讀其詩悲焉
遂依韻如左

曉部初催駝背裝故園回首淚千行穹廬霧暗關河杳
鼙聲嚴塞馬狂未死已知同情女餘生應爲憶蕭郎傷心
忍讀文姬賦一夜蕭蕭鬢似霜

太頂拜嶽

褰衣直上躡雲根落雁峯高接混元帝座眞疑通咫尺諸
山始見列兒孫茫然俛仰從何辨闕後洪濛獨此尊清夢

十年渾似約卻將狂簡問中原

東峯二首

萬峯肅肅起秋聲直到仙人掌上行
仞出五千天恍惚風

搖半壑霧縱橫東關紫氣占玄史

謂顧亭林徵君

北地龍文長杜

蘅石上有仲一望亂岑渾似海殘陽今古憶神京

詔米公書

鼎據三山疊嶂擎中峯玉女坐空明
靈龜吸盡玄元髓白馬驚傳使者精
五夜天風吹素佩千年金氣足長生
洗頭盆上月華滿九節遙同杜老情

萬壽閣

一柱高懸白帝臺何年宮闕對崔嵬
柏枝溜雨參天去嶽

色橫空拔地來，斷石刼深銷篆籀。唐玄宗封禪碑大文巍列竦風

雷明太祖夢游西嶽文西京今古千官路，却問騎驢笑幾回。

讀書太華留別同學諸子

紫陽夫子舊經壇，徵士親招渭水干。此去河汾闕將相，向來管樂媿蹒跚。歌殘劒氣龍光動，抱得陰符嶽色寒。兄弟故園如有憶，蓮花千仞好相看。

嶽頂四首

兩山盤礴拱高岑，萬壑松鳴帶露沈。終古乾坤茲晝夜，百年烟雨獨登臨。蓮開霄漢青天近，壁老鴻濛灝氣深。須信眞源西帝闕，長風六月已蕭森。

名嶽峯頭自結廬日光窈窈傍幽居一窗雲氣侵書潤五
夜松風入夢疎天濶太微搖處土地雄西土壯河渠中宵
欲共青藜老話到洪荒未闢初

匣劍帷燈萬古思嶽雲嶽樹總相宜從教寂歷空山雨剩
有蒼茫老驥詩北海軍中披褐日弘農五十說經時遺文
千載吾徒事清渭黃河入望奇

松檜峯前山色秋月明身共太虛游廣寒自昔傳蜍兔磯
石於今傍斗牛何處長風吹碧落一天銀海燦瓊樓扶搖
知在三千界坐待飄香桂子浮

登終南山絕頂

丹鳳城南太乙臺芙蓉秀色五峯開雲連北斗皇州近翠
撲三川列嶂迴六月梵音潮海度何年仙子雨花來夜深
人在諸天上坐聽鐘聲遍九垓

送弟仲文館澄署二首

彈鋏澁湄此壯游晉郊風物舊西州到來賸有三都賦茲
去寧爲五斗謀市靜山城留太古星寒客帳報新秋槐衙
不少珊瑚架烟雨芸窗足校讐

鄭國遺祠枕夕陽時來懷古對蒼茫人家幾堞存耕戰吾
道千秋在帝王直向雄文窺虎觀何須世路問羊腸乘閑
載酒尋奇去咫尺東村見草堂

謂路
徵君

哭路振公先生五首

弈世高名北斗過，窮年著述滿雲窩。
文章直逼黃初格，詞賦應傳白雪歌。
老去烟霞經意少，貧來歲月閉門多。
卽今哭向西州路，莽樹寒榛暗薜蘿。

髫齡曾傍渚宮行，嶽麓親闕落照橫。
夏口洲前鸚鵡賦，荆門樹裏採茶聲。
千秋蕙畝思公子，一枕雲山擬向平。
彩筆珊瑚驚氣象，阿誰重話楚王城。

大雅詞章老不窮，騷壇到處擘鴻濛。
柴桑人在羲皇上，谷口名存稼穡中。
不使凌雲狗狗監，常將寂寞效楊雄。
百年

文獻寥寥盡吳郡，秦關薤露同

謂顧亭林徵士

蒼茫世外有潛夫註盡山經與海圖
百里德星憐井鬼千年劍氣冷江湖
幾時重寫瀟湘竹何事能忘冰玉壺
誰鑄黃金存大雅須知絮酒在吾徒

空天風雨暗晴雯病裏相思不忍聞
問字已虛巴郡賦買

山忽斷岱宗雲

澄侯夏青田先生約余讀書澄上未果而先生捐館

壺梯漠漠秋烟

滿洛浦茫茫野樹紛應有中郎書墓筆
荒原披草拜徵君

拜明太祖遺像

聖容約可三旬許茅塢高懸載拜時
信有龍顏符泗長居然赤子識江湄
開天袞鉞星雲正振世文章嶽海奇
却憶鍾山風雨夜珠簾銅瓦幾人思

旅次書壁

雨歇泥中尋渡口雞鳴茅店戒行期百年兄弟憐聲價十
載文章感歲時沽酒欲從陶令醉放懷還唱渭城詩茂陵
賸有凌雲氣客久何妨奏賦遲

登梁山鐘樓峯

羣峯歷盡躡鐘樓一柱蒼然據上游自昔蓮花窺帝座於
今藜杖指神州中原地敞清秋色落日烟橫大漠愁欲向
山靈聊借問千年元氣幾人收

鈕云歷下
得意之篇

郊行

老去容光鬢有華孤懷零落在天涯魂驚北海難忘酒夢

斷東陵欲種瓜是處雲山堪入望到來莽樹卽爲家十年
博得秋蓬迹一縷長風送晚霞

壽靜齋孫公

贊府文華湛玉壺相逢話盡楚山孤十年劍識龍文氣此
日香分赤縣符官閣梅花清入座荒城濁酒醉堪沽壽君
乞得吳生管一寫烟雲冷水圖

鄂縣程夫子手植雙槐次石刻元韻

主簿祠旁問古槐衙齋深逼泮陂開龍潛不共乾坤老蜻
影長看歲月回信有文章驚海嶽眞疑神鬼獲風雷卽今
七百星霜後猶記純公手自栽

澄城白文學子餘廬墓賦贈

忽從澄水得名賢遙望寒榛一慨然落日應存藜藿恨懸
燈幾廢蓼莪篇九原霜露催魂夢三載蓬蒿老歲年媿我

父書多未讀黃河松柏雨綿綿

鈕云佳事佳
咏俱可千古

華雲臺和葉司空龍塘先生元韻

二十年前說劍時佛燈曾此照寒幃院門風雨深秋暗帝
座星辰午夜移老去關河驚短夢新來鴻雁起相思山靈
似識三生舊華髮譚經未是遲

客頻陽太史村居卽偕令弟登北山寧隱君丕旅自
奉先見訪比余東歸寧復至縣酒酣中夜爇火高

譚書此爲謝用龍門大史衛韻

萬斛明山敞素秋登臨佳日悵同游香分靖節東籬菊客
臥元龍百尺樓處士清輝連夜動函關紫氣到今浮還來
載酒聯床話塔影烟光慰別愁

贈華司馬張紹村

司馬何年臨太嶽風流且喜佐名邦通才自昔聞京兆雅
度於今見曲江東閣梅花浮客座西溪柳色照山窗時來
發興追工部三月春深燕子雙

咸林懷古四首

汾陽古廟抱城隈驛路長林宿霧開弈世山河存帶礪千

年袞鉞壯風雷漫愁玉座彤雲散猶似金戈鐵馬來王氣
只今西望近當門殘照一徘徊

李云汾陽功在社稷千秋如見英風

郭忠武王

杜甫文章雅頌流司功曾此佐名州嘗從澗水題新句却
望蓮花待暮秋極目亂離深谷裏經時懷抱曲江頭鄭南
亭子知何處欲向參軍訪舊遊

郡丞紹村張君擬爲少陵起祠歲時祀之李云起調

高接尤合拍

杜工部

圖南亦是英雄客拂袖何當老華山

李云得尚論之體

一自真人

高虎視長留處士拜龍顏茫茫久識乾坤位嶽嶽親窺將

相班眼底太平狂笑去三峯縹緲白雲間

陳希夷先生

二華嶙峋河渭同荒苔斷碣紀萊公兒曹慣誦名山句父
老猶憐景德功鎖鑰有時憑雅望樓臺無地見清風李云
用事

雅切妙
絕之篇

征途夙仰宗臣範綠草萋萋嶽路東

寇忠愍公

鈕云王右軍作書山林冕紱各因所書之文而變
我於咸林懷古亦云李云四詩慷慨悲涼盛唐音
節當度越諸子並驅北地信陽矣又曰空同懷古
諸詩獨擅千古此足方駕

解梁謁漢前將軍關公祠四首

洪河中斷太行回大氣蒼茫冀野開
一自堯階咨四嶽還教漢鼎照三台
樓桑樹老真人去湘浦春深旅雁來
賸有華夷瞻故國千秋袞鉞煥雲雷

其二

將軍遺廟起闐邱戶接層巖枕碧流
風雨有靈通劍閣江山何處望神州
五雲日日天顏近芳草年年帝子愁
且喜英雄桑梓地惠連今始得同游

時偕仲文

其三

憶昔間關報主功金戈鐵馬自西東
馳驅百戰憑艱阻割

據三分誓始終江漢朝宗期赴海星垣旋轉總環中却思
丞相神明鑑軼絕羣倫信不同

其四

五十才名鬢有霜時窺帝座數文昌只今闕里儼相似欲
往從之路阻長終古人心懸皎日遺編左氏副玄王傳經
耿耿憐清夢余庚午歲曾夢
帝譚左氏春秋一水恩波到夏陽

郡中感懷二首

孤城蕭索戍樓空故苑荒臺一望中何處蓬蒿生里巷誰
家井臼冷西風飛花忍別墻頭去斷草應憐落照紅最是
舊巢雙燕子歸來難認主人翁

左輔提封翊漢家誰教劫火冷繁華
嗷嗷鴻雁中原滿落
落晨星四野賒開府舊書傳雨露
中丞某公隴田新鬼哭桑麻
只今聖主頻西顧漫向荒村數暮鴉

聖主

聖主恩波真浩蕩秦民萬里復流亡
須知賈誼書堪上莫
道漢文讓未遑此日田園尋井竈
他時妻子盡參商憑誰
寄語調元相好作甘霖輔禹湯

劉明府

邵陽令
名之琨

玉葉樓桑世象賢莘黎休息賴仁天
向來止飲黃河水連
歲方耕百畝田五袴真傳西郡誦
一文不受會稽錢觀風

須採山人話爲續循良漢史編

梁山禹王廟登高

西風落木萬山秋此日登臨宿霧收一望中原皆禹蹟多
時煙草悵神州尋真正是重陽後歷險長憐石徑幽却憶
當年彭澤令匡廬曾爲遠公留

雁字二首

彤毫何事托長空斷續幾行寫未工洛浦鴻驚王令筆上
林書寫漢臣忠縱橫煙雨千軍陣曲折關河四海同一自
史皇留聖跡年年紫塞見宗風

夕陽影裏度寒沙垂露懸針羽翰斜婉轉迴文蘇蕙織蒼

茫蚪篆魯王家釵分股折長傳恨鳳閣天門勢自賒漫向
鴻都尋短碣春來秋去遍煙霞

青柯坪

突爾嶽蓮排地起高懸樹杪見琳宮行人到此渾無路石
磴微茫漸可通斷峽驚濤噴素雪幽禽細語靜臨風尋真
十載名山夢華髮重來志未窮

白門四十韻

三千
里詩

六代繁華苑千年綺麗場石頭雄虎峙鍾阜秀龍翔星野
文開斗山川域奠揚鎮金埋楚穴引水鑿秦塘險阻分南
北車書會四方大江漫浩浩高楫望洋洋地勢吞徐泗波

濤斷溟滄久占王者宅夙著霸圖疆雙闕連雲漢層臺隱
鳳凰朱樓夾道起紫陌接天長待漏聞雞報鳴珂列雁行
宮花蜀錦爛御柳嫩鵝黃太乙宸居靜千家曙色蒼貔貅
森武庫部署應文昌戚里爭輕艷城隅慣採桑車騎珠作
戶處仲翠爲梁幕府初開讌參軍舊引觴承恩專斧闥恃
寵擅椒房歲歲笙如沸朝朝人似棠青樓十萬戶畫閣九
迴廊別送勞亭酒詩傳花月章曉烟桃葉渡暮雨莫愁鄉
玉樹商歌女金壺子夜倡管絃憐玳瑁畫舫逐鴛鴦一自
鼎湖去遂令郊社荒衣冠啼晚鷓花草泣寒蠶王氣降帆
盡中流鐵鎖亡青奴朝野恨銅淚古今傷故壘烏衣燕新

愁蓼葉霜胭脂紅廢井梅額淡宮粧秋黍迷鄣郡春鶯語

建康李云愛其雅飭僧歸白下寺客放海門航莘隴三千隔江風

五月涼景陽鐘斷續西浦竹琳瑯眼倦蕭梁業夢回彩筆

光漫遊隨釣叟痛飲托高陽時弔孫郎碣還棲太傅坊亭

臺餘戰伐民物半瘡瘡寂寞潮聲咽分明烏韻鏘彈鐔觀

上國作賦擬長楊李云洋洋大篇足壓元白

壽史節母雷十二韻

麟趾周南化葛覃聖母風邑舊有葛覃里宣徽高世代莘野啓鴻

濛靈氣貞元應嘉祥弈葉通大家分雅頌歸妹叶絲桐五

馬聞詩異柏舟掩淚同謏留夫子恨祭亡夫史有文誠抱義姑衷

自昔河洲苻於今岱嶽松名家成漢史篆筆繼秦封

善八分書

白髮滋蘭種青雲長桂叢苦心天有鑒奇節道非窮彤管

流芳遠玉芝按譜工

產芝九莖

何須金母笑定有歲星逢

秋霽望終南十二韻

試題

大野平林闊皇圖列嶂連五峯分太乙八水敞秦川絕巘
雲長護層巒翠自妍勢將橫北斗秀欲奪青蓮疑有真人
窟應留處士眠說經消紫氣演法麗金仙匡嶽渾無地眉
岑已半天霜清隋苑露雨歇漢宮煙倚檻懷康樂憑虛憶
仲宣看山終是癖作賦豈如椽黛色長安滿秋容雁塔懸
杖藜何必去拄笏正當前

曲江春宴十四韻

試題

別浦芳暉麗平川列岫長柳明青輦路花燠野人莊萬戶
連閣道千門啓建章流觴三月半藉草五雲旁盛代高梁
苑羣才似武皇說經雄虎觀作賦獻長楊走馬宜春陌開
筵錦瑟場杏園煙漠漠雁塔霧茫茫玉餅傳中使金枝出
上方君恩同浩蕩遲日更徜徉醉去紅成幄飛來翠染裳
珊瑚真架筆玳瑁雜書裝歌發魚龍舞名題日月彰白衣
占將相紫氣在文昌

壽耀州李使君穆菴

經歲泥陽客鉞彈漆沮中使君推武庫作郡似文翁山水

鳴琴雅弓刀射虎雄名園搜古碣夙駕慰田功六月南薰
度西方嶽降隆真人占紫氣舊史重關東

莘野先生遺書卷上終

莘野先生遺書卷下

莘野康乃心 著

東吳顧亭林
華山王山史增定

北徵路振公讐校

雜著

王華遊雜記

庚申寒食日與弟仲文拜訪吳郡顧亭林先生于王徵君
山史家次日先生賜顧即步行五里許同游竹林寺又次
日丁酉始入華山從僕一人攜囊而行期以古蹟名勝有
文必錄庶成一時快事前署總目無則闕之時日方旭山

翠撲人書之以志歲月河山耕牧士洽陽康乃心孟謀甫
書于雲臺古觀中

雲臺觀

竹林寺

玉泉院

三峯插秀

登覽

二日觀太華三峯

來談山同坐青苔上

石室

王二云

旁有白雲菴

陳集

五嶽當先

元精

山蓀亭

文岡

陝西轉運副使游師雄元祐九年四月二十

水上石亭高亭下水聲響樵客

五龍真訣 靜演先天 一般春 悟玄高臥 人
龍臥處 希夷陳先生辨 世傳希夷先生吞霞伏
氣閉息長夢弈龍主于巉巖却鳳沼于蒲車登遐倒
景遂爲尸解仙宗不知先生非方外士也先生生晚
唐家亳之真源縣長興中舉進士念唐室旣卑不可
振南遊太和掩鼻五代宋旣受禪始北徙華山鑿洞
長臥爲終焉之計藝祖太宗朝兩聘皆至竟不屈而
去遺有先天太極二圖濂溪堯夫各分演之噫嘻先
生非方外士也以周宋爲魏晉以華嶽爲首陽抗不
仕之節而世莫知其貞以先天演四聖以太極定一

尊闢理學之源而世莫明其大蓋有唐之純臣而趙
宋之儒宗也世之知先生者寡矣余以壬戌季冬有
韓藩之役過華陰適縣尹邢君有桑梓舊契偕余同
謁謹僭而書之以告後之君子天啟三年孟春瑯琊
後學宋鳴梧題

王猛臺下

梯雲 醉溪 白石清泉

五里關上

仙谷 金天柱石 太原高一麟書

靈官殿

仰止三峯
連雲接漢
空山疊翠

盛繼之

希夷峽

中天積翠

喬壁星

西秦勝槩

天開圖畫

餐霞洞

天
千古精神

龍泉
石洞

飛巖驚濤

雲門

天塹
雲樹生香

孤雲野鶴

漱玉

萬仞壁立

見泉問道之地

玄關

柱接高尋

英雄回首

處

楊有仁

莎蘿坪

眞仙世

李臯

從來素有山林志
今日華峯頂一行

輕舉幾勞攀躋力
何年再至禮西清

香巖李臯

喬枝翠

寒色冉冉伴行場萬籟息游響千峯開寶光泉影明

下界經聲來上方月華坐欲滿此夕一何長北地米萬鍾

大地湧蓮花千般鳥道斜小橋流積雪孤嶂斂殘

霞緣岸生莎草懸崖綉野花上方鐘磬杳到處即仙

家葉學臺映榴

青柯坪

真山水水飛石鳴青柯仙境雲門天下第

一名山仙境太華山游華山十二首天啟壬戌暮春

行攜謝眺驚人句載筆名山豈憚遙紫氣臨關迎露

冕赤龍扶杖上霞標塵揮仙掌雲摩盪劍倚明星夜

動搖封禪臺荒鑿輅遠且呼毛女問前朝一探奇

却笑昌黎怯取道寧同襄野迷拍手三天招皓鶴回
頭四海總醯雞猿猴倒掛疑無路絙索孤懸自有梯
不信耕烟種瑤草石溝曾破老君犁二霏霏彩翠

濕芙蓉歷險窮幽幾萬重呼吸天中通帝座兒孫膝
下擁諸峯石壇禮斗銀河近竹院吹笙玉露濃最愛
步虛聲歇後松風澗水韻疎鐘三九天飛瀑落巖

扃觸石敲雲鳥亦驚白晝雷霆喧暗壑晴天風雨起
寒聲奔來濺沫浸衣濕轉入澄潭照膽明漫道出山
泉水濁涓濱東去共流清四山中仙酒足流連更

遣茅龍喚子先興到拍浮斟玉井醉來身世在金天
水簾風動搖環珮靈籟山空勝管絃戲與叔齊相對
博西巖贏得種芝田五 度棧休歌蜀道難捫蘿脅

息凜相看乘危一看頭堪白引滿三杯骨尙寒擦耳
崖前緣絕壁迴心石上俯驚湍金丹換骨風堪御願

向飛仙借羽翰六 峻嶒十步已三休錯認山腰是

上頭客子魂驚啼越鳥僕夫力盡喘吳牛鶯花已報
青春晚霜月先傳白帝秋誰見黃河小如帶微茫一

氣罩神州七 擘破雙花詫巨靈丹青面面削銀屏

陰崖雪積嵐光冷古峽龍藏霧氣腥百二關河分地

軸三千世界拱天庭誰能話盡開山事欲訪希夷尙
未醒八下界風沙白日昏山中幽勝更誰論參禪

直踞蓮花座沐髮輕翻玉女盆杳杳河源迷宿海茫
茫山勢暗崑崙虛傳箭括通天路咫尺無繇叩帝閭
九 凭高座石閱人寰今古匆匆醉夢間七國分爭

纔半局一丸何用閉重關轉輪日月圈中急揮塵煙
霞象外閒可是嶽靈容傲吏謫居常得傍名山十

洞天雞犬寂無譁疑是秦人別有家偃蓋古松垂五
粒綴珠奇樹吐三花驚看玉井船如藕遙憶蓬山棗
似瓜問訊關門仙令尹青牛何日返流沙十一 感時

懷古不勝情肘後蒼精夜自鳴禹蹟九河沉大陸秦
關千嶂護長城華陽地倘堪歸馬大白星高喜弄兵
北望浮雲連朔漠日邊何處是神京二十
霄玄度題 羅浮鄧雲

藏經樓

千尺幢

當思父母 英雄進步 覓仙玄關 踵息庵 通

天門

百尺峽

放大光明 王質

勇往直前

前平等觀

梯雲飛

虹

二仙橋

瘟神洞 心平亦平

顧增

老君犁溝 耕雲

王增

鐵牛臺

棧絕枝通

猢猻愁

氣象萬千

上官粒

斜陽拱翠

呂雲藻

峭壁 紫氣凌

雲 雲山依舊 天啓壬戌之秋右副卿邵陽康國

祚至此記石

白雲峯

白雲仙境

一天門

擦耳崖

仙人砭

日月崖

金天洞 吞吐光華 從此愈奇 念峴臺念峴臺

念荆峴湯公也公官黔黔爲先師馬督兵地明發之

懷實與俱焉

王弘嘉生山史之弟先

嶺底臥龍菴

滿岫泉聲咽危石芙蓉天削老仙羣足沾窄竇無三
寸膽到蒼龍小十分諸嶺四圍看漸下半巖雙屐已
層雲蓮花頂似輕身藥玉女峯成出世文

錫山陸朝瑛

有明崇禎己卯菊月吏部郎豫章雪堂熊文舉同年
中翰廣武滄嶠李仲熊典試復命來游此山度繙尋
槿直窮峯頂多生麻劫得此奇觀籠煙梯霧直接混
茫介渭盃河渾忘身世從遊者爲華陰孝廉史標三
原孝廉韓詩二生皆余新秋榜中取得佳士也因憶
先輩宮詹石齋黃道周太史機部楊廷麟與余常約
爲華嶽之遊皆以世事遷延不果並題姓氏以誌遠

懷茲山永奠此石長存南北高峯與聞斯語 夢想

三峯數十年今來乘興盡高顛英雄須曉回頭處名

利何時是萬全丁未夏日口占

峒樵梁聯馨

松風破夢

蒼龍嶺

登天雲梯 躡雲 韓退之投書處

東峯顧云總名明星玉女峯

萬松嶺 山盡頭 東峯絕頂 萬仞松濤 玉女

峯邢侗洗頭盆 白馬 窗虛五夜

蓮花峯

枕破鴻濛

孟津王鐸書
江寧葉舟刻

天下壯觀

王質

西峯絕

頂邢侗

蓮峯高處

呂雲藻

獨立振衣

趙漁

高可留

雲

摘星臺

米萬鍾

守身崖

米萬鍾

蓮花洞

巢雲

質王

肺石

乙未秋王質子靜息西峯復菴道兄生

弟允塞姪伯超攜酒來飲連榻數夕

倚天奇氣

文昌閣

復菴

山史題

窗涵紫氣開長夜枕傍蓮花臥白雲

范上

聯古

削華多飛遯遯固不足奇其巔雖寄迹中情未

相宜所以王景略猶有捫虱時吾昔涉山峯愛其松

之姿自經山下亂還向山中悲欲問前朝事而今在

者誰或爲張公超或爲陳希夷其餘吾不願亦復不

敢知楚才甘棄世悠悠待天期一日即千春坐觀星

辰移李河濱碧荷千瓣攢霄外靈乳一泉落奎中甲辰

午月九日送西峯復菴道長歸山松毛噓火香飄洞雲葢浮窗

潤透書湘濱歸嶽頂時有藏書之願故作此丁未

中秋月游過湘濱道翁復菴看山食霞一日一夜雲

隱王弘嘉小記

玉井路云絕頂上

南峯大頂

華嶽金闕 極奠金方控三鎮而俯南粵藩垣上國

稱天府鼎臨兌位障八川而連北斗屏翰中邦奉至

尊 一柱擎天百二雄關擁大帝帝座三峯朝斗千尋仙

掌握神州 金天半轉乾坤泰西灝晴占日月華以

扁聯 落雁峯 千巒羅拜 松風天外 乾坤合處

真源 低語連宵 高尋白帝 兒孫萬峯 龍

巢 縹渺巔 萬象空濛 蒲城未菴單允昌到時

崇禎三年三月十五日

仰天池

太華絕頂

高與天齊 扶搖天際 正合我心吉水李日宣 耳通

天語 兒視諸峯 手可摩天 高尋白帝 平臨

日月 神明奧區 俯視一切 迴朝星海

俯貌塵寰 太虛同遊 南峯絕頂 伸手摩天

袖拂天星 羣山環拱 目空四海 沖天峰 高
視

避詔岩

避靜處

環翠岩 凌風天際 窗虛五夜

叔卿博臺

河山子曰余兄弟錄華山諸題殆寥寥乎十之二三

焉其他斑剝漫滅於風霜苔蘚至莫可認識及恆蹟之所不到者尙多也然是錄在莫春而余以九月中再登嶽頂蓋山之奇佳於秋始止矣因附志之重陽前一日

恥齋十友記

一曰梁山

一曰黃河

一曰河中之飛浮山

一曰夏陽莘里之漢泉

一曰文廟白松

一曰漢中平二年曹全碑附十三字

一曰葉司空郃志

一曰華雲臺塔影

一曰太清觀古檜

一曰里中園圃大槐西畔第一株尤奇

太一子曰城中十友吾於此可以不孤矣何必作青白眼涼涼然歎無偶亦何必低眉終日向俗人耶韓陵一片所得不較多乎辛未初夏九日自跋

莘野先生遺書卷下終

跋

右莘野遺書三卷清邵陽康乃心著乃心字孟謀一號太乙中康熙己卯舉人庚辰會試不第大臣有欲薦之者固辭歸里癸未清聖祖西巡駐蹕潼關問關中經明行修之士韓城劉蔭樞以乃心奏由是文學名大著清史列入儒林傳稱其少稟庭訓能詩文並引當時諺云關中二李不如一康其見重如此邵陽縣志曰孟謀詩文俱有磊落不羣之概同時如李天生王山史皆爛詩文法者而於太乙不聞議一字亦懾其磊落不敢吹求云云又清史謂太乙早師李顥戒空談敦實行尋從崑山顧炎武華陰王弘撰

遊讀書講道自守甚峻新城王士禎奉使祭告西嶽見所
題秦襄王墓絕句於慈恩塔上極稱之翌日詩名徧長安
而乃心不知也今觀所爲詩及遊華山紀皆雄駿秀拔洵
有如邵志所評者知其得於師友漸摩者深矣乃心別著
三千里詩一卷久有刻本行世是編爲其鄉人鈔本卷首
錄年譜及銘誄詩札等次分兩卷一爲乃心所著律詩數
十首一爲所著遊華山記等其中閒錄三千里集中詩原
鈔皆注明三千里詩四字第鈔本未臻整齊茲區爲三卷
以其弟康緯所述年譜及碑誌等爲一卷曰卷首乃心自
作五七言律及排律爲一卷曰卷上華遊雜紀等爲一卷

曰卷下中有訛脫之字逐爲訂正刊入叢書聊以存邦賢
之佚著云爾民國二十三年十二月校

長安宋聯奎

蒲城王健

江寧吳廷錫